



**Gemeinsam Äntwert vun der Justizministesch Elisabeth MARGUE an der Ministesch fir
Gläichstellung an Diversitéit Yuriko BACKES op d'parlamentaresch Ufro 1354 vum honorabelen
Deputéierte Sven CLEMENT iwwert d'Zwangsbestietnesser zu Lëtzebuerg**

1. Wéi vill Fäll vun Zwangsbestietnesser goufen an de leschten 3 Joer zu Lëtzebuerg entdeckt a juristesch verfollegt?

Laut de Justizautoritéite goufen an de leschten dräi Joer keng Zwangsbestietnesser entdeckt. Et gouf an deem Zäitraum och keng Plainte deposiert op Basis vum Artikel 389¹ vum Code pénal.

2. Wéi vill Bestietnesser mat Mannerjärege (ënner 16 Joer oder tëscht 16 an 18 Joer) goufen an den leschten 3 Joer zu Lëtzebuerg registréiert?

Laut de Justizautoritéite goufen an de leschten dräi Joer keng Bestietnesser vu Mannerjärege registréiert. Et gouf och keng zivil Prozedur op Basis vum Artikel 180² vum Code Civil registréiert.

3. Wéi eng legal Instrumenter gëtt et aktuell, fir Affer vun Zwangsbestietnesser ze schützen, a gëtt et Pläng, fir dës ze verbesseren?

Zwangsbestietnesser sinn e graven Ugrëff op d'Mënscherechter an duerch verschidden international Normen verbueden, ewéi zum Beispill dem Artikel 16 vun der internationaler Mënscherechtkonventioun, dee virgesäit, dass e Bestietnes just aus fräiem Wëlle ka geschloss ginn. Et ass op Basis vun deenen Normen, wou deemools d'Verbuet vum d'Zwangsbestietnes duerch d'Gesetz vum 4. Juli 2014 an eis national Gesetzgebung agefouert gouf. Dëst war eng éischt wichteg Etapp fir d'Affer vun Zwangsbestietnesser besser ze schützen, och wann d'national Gesetzgebung scho virum Gesetz vum 2014 Zwangsbestietnesser huet kënne bestrofen. Dann awer d'Uwendung vun den Artikelen aus dem Code de Procédure pénale iwwert d'Belästegung, d'Vergewaltegung, d'Entféierung, d'Kierperverletzung, asw.

¹ **Art. 389.** Celui qui, par des violences ou des menaces, a contraint quelqu'un à contracter un mariage ou un partenariat, est puni d'un emprisonnement d'un an à quatre ans et d'une amende de 20.000 euros à 40.000 euros, ou d'une de ces peines seulement. La tentative du délit est punie d'un emprisonnement d'un an à deux ans et d'une amende de 10.000 euros à 20.000 euros, ou d'une de ces peines seulement.

² **Art. 180.** Le mariage qui a été contracté sans le consentement libre des deux conjoints, ou de l'un d'eux, ne peut être attaqué que par les conjoints, ou par celui des deux dont le consentement n'a pas été libre ou par le procureur d'Etat. L'exercice d'une contrainte sur les conjoints ou sur l'un d'eux, y compris par crainte révérencielle envers un ascendant, constitue un cas de nullité du mariage.

Lorsqu'il y a erreur dans la personne, le mariage ne peut être attaqué que par celui des deux conjoints qui a été induit en erreur.



Mat der Ratifikatioun am Joer 2018 vun der Istanbul Konventioun vum Conseil de l'Europe, déi éischt international juristesch bannent Konventioun am Beräich vun der Präventioun a Bekämpfung vun der Gewalt fondéiert op de Sexe an op de Genre géigeniwwer Fraen a vun der häslecher Gewalt, huet Lëtzebuerg sech engagéiert géint all Forme vu Gewalt géigeniwwer Frae virzegoen, dorënner déi verschidde Forme vu sexueller Gewalt an och d'Zwangsbestietnesser.

Zu Lëtzebuerg gëllt d'Istanbul Konventioun säitdeem an éischer Linn als eng Ligne de Conduite, déi d'Regierung an hirem Handele guidéiert, fir den Dispositif zum Schutz vun Affer vu Gewalt, an hirer Diversitéit, weider auszubauen, besonnesch wat d'Incriminatioun vun Doten ugeet, wéi zum Beispill de Verbuet vu weibleche Genitalverstümmelungen (Artikel 409 bis, Code Pénal) an Zwangsbestietnesser (Artikel 389, Code Pénal), awer och d'Präventiounsaarbecht, an d'Prise en Charge vun Affer an d'Sanktioun vun Täter.

De Referenzsite „violence.lu“ ass hei e wichtegen Outil fir eng nidderschwëlleg Informatiounsverméttlung unzebidden an iwwert de legale Kader, deen zu Lëtzebuerg en vigueur ass, an déi verschidden disponibel Hëllefsservicer ze informéieren.

Op Basis vun de Recommandatiounen vun der Evaluatiounsvisite vum GREVIO (Groupe d'experts sur la lutte contre la violence à l'égard des femmes et la violence domestique du Conseil de l'Europe) iwwer d'Ëmsetzung vun der Istanbul Konventioun um nationale Plang aus dem Joer 2023 an dem Wonsch vun der Regierung den nationale System weider auszubauen, sinn zwee konkret Projeten am Regierungsprogramm festgehale ginn:

- d'Ausschaffe vun enger Strategie fir de Kampf géint geschlechtsbaséiert Gewalt ze stärken;
- den Opbau vun enger nationaler Ulafstell fir Affer vu Gewalt.

Dëst sinn zwou Moosnamen, déi den nationalen Dispositif stärke fir Fraen a Meedercher, grad wéi och Männer a Jongen, onofhängeg vun hirem legale Status an an hirer ganzer Diversitéit virun Zwangsbestietnesser an anere Forme vu sexueller a physescher Gewalt ze schützen.

Eng weider positiv Entwécklung um legislative Plang sinn d'europäesch Direktiven iwwert de Kampf géint d'Gewalt géint Fraen³ an de Kampf géint de Mënschenhandel⁴, wou Lëtzebuerg aktuell um Gaangen ass un der Ëmsetzung ze schaffen. Sou gesäit besonnesch d'Direktiv iwwer de Mënschenhandel vir, dass Zwangsbestietnesser als eng Form vun Ausbeutung an d'Definitioun vum Mënschenhandel bäigefügt soll ginn.

³ https://eur-lex.europa.eu/legal-content/FR/TXT/PDF/?uri=OJ:L_202401385

DIRECTIVE (UE) 2024/1385 DU PARLEMENT EUROPÉEN ET DU CONSEIL du 14 mai 2024 sur la lutte contre la violence à l'égard des femmes et la violence domestique

⁴ https://eur-lex.europa.eu/legal-content/FR/TXT/PDF/?uri=OJ:L_202401712

DIRECTIVE (UE) 2024/1712 DU PARLEMENT EUROPÉEN ET DU CONSEIL du 13 juin 2024 modifiant la directive 2011/36/UE concernant la prévention de la traite des êtres humains et la lutte contre ce phénomène ainsi que la protection des victimes

Lëtzebuerg, den 13 November 2024.

D' Justizministesch

(s.) Elisabeth Margue